



Sesida dals

20 d'october 2025

Communitgà ils

21 d'october 2025

Protocol nr.

737/2025

Dumonda Zindel

concernent la reducziun da las contribuziuns G+S tras il UFSPPO

Resposta da la Regenza

Tar la dumonda 1: La decisiun da reducir las tariffas da contribuziun per 20 perschient, che l'Uffizi federal da sport (UFSPPO) ha annunzià il zercladur, stat tenor la Regenza evidentamain en cuntradiziun cun las finamiras cuminaivlas da la Confederaziun e dals chantuns da rinforzar a lunga vista e duraivlamain la promoziun dal sport per ils uffants ed ils giuvenils. Giuventetgna+Sport (G+S) è dapli ch'in program da sport, el è in instrument central da la prevenziun. Investiziuns en G+S èn investiziuns en la sanadad, en la prevenziun da violenza e da dependenza sco er en l'integraziun da personas giuvnas. Gist durant in temp, en il qual s'augmentan las grevezas psichicas tar ils giuvenils, èn structures da sport segiras indispensablas. Reducziuns dattan qua in fauss signal e pericliteschan il success a lunga vista da la promoziun svizra da sport. Ina reducziun da las tariffas da contribuziun G+S na periclitass betg mo la quantitad, mabain er la qualitad da las purschidas e restrensches l'access ad in sport pajabel e nunbirocratic per tuts.

Tar la dumonda 2: Gea. Il schef dal Departament d'educaziun, cultura e protecziun da l'ambient ch'è cumpetent per il sport, ha appellà en num da la Regenza al Cussegl federal d'impedir las reducziuns planisadas e da metter a disposiziun ils meds finansials ch'èn necessaris per il preventiv 2026 e per la planisaziun da las finanzas a vista pli lunga. Las investiziuns en G+S na sajan betg expensas voluntaras, mabain ina mesira orientada al futur. Ils custs da questa mesira stettian en ina relaziun fitg favuraivla cun il niz duraivel. La Regenza è persvadida, che l'entira societad haja in interess d'ina promoziun persistente da G+S – tant per motivs da la sanadad, socials sco er economics.

A chaschun da sia sesida dals 12 da settember 2025 ha il Cussegl federal concludì da rinforzar finanzialmain il program per la promoziun dal sport G+S: Concretamain duai il credit vegnir auzà gia durant l'onn current per 20 milliuns francs e l'onn suandant per 28 milliuns francs. Tras quest auzament vegni garantì, che las contribuziuns da G+S a favur da curs e da champs na ston betg vegnir reducidas, quai er sch'il dumber da participantas e participants creschiss vinavant. Il Cussegl federal renconuscha uschia la gronda impurtanza ed ils effects positivs da la promoziun dal sport e dal moviment per uffants e giuvenils.

En la sessiun da december 2025 sto il parlament anc approvar il sboz dal preventiv 2026 dal Cussegl federal. La Regenza vegn perquai ad appellar instantamain a las parlamentarias federalas ed als parlamentaris federals dal Grischun da resguardar, quant central ch'igl è per il Grischun d'approvar quests meds finansials per mantegnair e per sviluppar vinavant ina vasta purschida da sport e da moviment en tut il chantun.

Tar la dumonda 3: Sin basa da las explicaziuns qua survart parta la Regenza dal fatg, ch'ina cumpensaziun sin plaun chantunal na saja betg necessaria.

La Regenza renviescha però al fatg, ch'ils custs supplementars en il sector da G+S vegnian pli probabel cumpensads parzialmain tras respargns en auters secturs dal UFSPO. Quai pudess er avair consequenzas per projects e giavischs en il chantun.



En num da la Regenza

Il president:

Marcus Caduff

Il chancelier:

Daniel Spadin